

Vicario Episcopal pa Aruba, Rev. Daniel Wieslaw Szpila

“Profana graf di Betico ta nifica profana alma di Aruba”

No tin un rito religioso special pa repara un echo asina

ORANJESTAD - Vicario Episcopal pa Aruba, Rev. Daniel Wieslaw Szpila, a expresa su mensahe pa loke ta e caso di e graf di Betico Croes (q.e.p.d.). E religioso masha consterna cu e noticia cu a sali den tur media di comunicacion ayera ta bisa cu curpa humano, tambe despues di morto mester haya respet, tanto pasobra e tabata representacion di e persona, creacion di mas stima di Dios, como tambe pasobra e tabata tempel mes di Dios.

Pader Daniel ta referi na e caso biblico di Tobias kende tabata risca su bida pa dera defuntonan, kende nan curpa tabata riba caya pa orden di rey, y Dios a hay’e husto y heroico di su parti. Fuera di


esey, padre Daniel ta indica cu un profanacion asina ta herida sernan keri di e defunto cu ta na bida, of un nacion, ora tin profanacion di grafnan di algun minoria, of nacionalidad stranhero, manera sa sosode na Europa.

Sin duda e acto repudiabel aki a causa un herida y hopi tristesa tanto pa famia di e defunto, como pa henter pueblo di Aruba. E ta bisa cu “profana graf di Betico ta nifica profana e alma di Aruba”, pues ni maske profanacion di cualke graf ta mes repudiabel, esun aki tin un nificacion diferente pa pueblo.

Pa loke ta trata di acto di reparacion pa restonan di defunto, Vicario Episcopal pa Aruba, Rev. Daniel Wieslaw Szpila ta

bisa cu esaki ta depende con esaki lo organisa cu Pastoor di Parokia. E ta sugeri cu sin duda un acto religioso, intimo, kiermen di famia y amigonan, guia pa Pastoor na ora di sera graf bek, lo tabata na su luga. Esaki lo ta un acto cu ta defende e defunto di un otro profanacion cu ta un curiosidad sin respet. Un Santo Sacrificio di misa despues, den cual pueblo lo por a participa pa resa pa defunto tambe lo tabata na su luga.

Finalmente e religioso a señalá cu no tin un rito religioso special pa repara un echo asina. “No por traha ritonan pa actonan cu no mester sosode hamas”, segun Rev. Daniel Wieslaw Szpila. □



Rev. Daniel Wieslaw Szpila